


沖冠
編輯

江戸夢華詩

下

413
944
2止



門 4 13
號 944
卷 2

江戶華詩

東京

蘆洲植村先生節物詩

歲旦登城

冠嶺沖脩編輯

翠松風靜曙光新。現出昇平聖代春。
三百侯朝三百歲。月正元日大城闈。

元旦拜旭

江戶華詩 卷之二

大正十五年二月
仙次郎氏寄

人趁三元早起宜。高輪臺上望春熙。
東都初曉日東照。宛似神君開國時。
松竹裝門

迎歲誰家不待賓。門頭先見淑光新。
瑞多松茂竹苞色。裝飾太平無盡春。
汲井華

不要立春傳女官。元朝手汲井華新。

未曾一飲且能嗽。淨盡窮年心地塵。

飲屠蘇酒

屠鬼蘇人藥太良。浸來春酒瓦杯香。
賀正新飲白翁始。未許兒童先一嘗。

喫餅羹

雜烹蔬脯省盈鍋。年餅春菘羹一和。
三旦連咬俱笑祝。不曾加少只加多。

家家賀正

聖代新正可賀哉。工商雜士往還回。
疎投名刺親通謁。陋室閒門一向開。

商車初運

春旦纔能欲狗天。忽驚雷鼓轉街前。
商車陸續爭相運。春物新登大賈廛。
童男女試筆

寒窓炙硯學塗鴉。試筆春頭墨吐華。
翁媪喜看含一笑。簷梅恰放雪餘花。

娼女拜年

拜年妝麗女郎嬌。向戶松筠瑞色饒。
近過七軒行八字。遲遲故作道中遙。

寶船圖

畫圖枕藉夢逍遙。一夜無人不富饒。

珍寶滿船銀海大。濤聲好處趁春韶。

謠曲初唱

新正三日太平歌。從此城中鼓笛多。
八百八街喧似海。東風無處不春和。

萬歲樂

簡朴衣冠古氣多。春春長見自三河。
欽渠負荷君恩重。尚唱昇平萬歲歌。

揚花妓

天女游嬉促歲華。雪殘楊陌已飛花。
柔荑更弄風流線。逐鳥傳春渡萬家。

賣鮑鮓

酒邊春淺已忘寒。渴想清冷冰齒餐。
驀聽一聲江鱖鮓。耳根消熱口生酸。

放紙鳶

楮翼輕飛戾上天。相風童弄手中權。
誰思射鵠援弓繳。讓此操絲易放鳶。

歌牌戲

春蚯亂走百牌多。涵向分明秋水波。
縱欠清姬解唐律。能諳君子國風歌。

打小球

小球飾出絲華鮮。弄到春葱轉轉圓。

萬打未曾離袖脫。却疑纖縷暗相牽。

羽板戲

繡板春聲響綺攏。打丸嬌女避微風。
劇憐輕舉燕如影。舞墮情郎開掌中。

上京圖

五十有三東海程。披圖何必要官榮。
兒童也有尊王意。一路爭先向洛城。

卯日賽

妙現祠邊好物華。東風梳柳野塘斜。
翠雲鬟上戴符白。劇勝雪頭簪絳花。
人日上元暖粥。

前回糝翠後回紅。小豆新菘調得工。
支饒薄糜何可比。甘糠味暖素霜融。
公射開場

善射一人誰復爭。發而皆中證昇平。
曾無騎使祈楓廟。間馬春嘶柳外聲。
商童放游

地獄釜開人界春。商童極樂放游新。
終年勞役酬何物。六百青錢一手巾。
住吉舞

形屬僧徒技屬優。得錢狂舞戲街頭。

幾群仍是擁華蓋。雙柝疊歌相和。稠。

大神樂

神樂古風今已無。鼓聲新促弄毬娛。
承螭技術應輸巧。如菓在枝輕著柁。

旭如來開帳

女郎歡值耗磨辰。淡粉輕烟淋氣新。
旭日滿樓開錦帳。佛光普照吉原春。

大師遷座

兩師迎送每三年。六六僧坊一月遷。
此座新正尤可惜。法衣薰滿護摩烟。

聖堂釋奠

二月中丁聖殿開。和風韶景鼓簫催。
一鬻猶有三千弟。祭酒追趨助奠來。

初午祭

孤為廟主自何年。午祭春膳飽腹便。
更有黠童追學究。家家門口掠神錢。

謁義士墓

義夫忌日好春晴。尋迹人遵東海行。
二月花深泉岳寺。芳傳四十七碑名。

涅槃會

故躔孤照逗諸宗。春半如秋鬼淚濃。

別有在家人奉佛。珍藏花餅手煎供。

辨天堂琵琶會

一目街祠磬一群。四絃彈遍月紛紛。
恍思竹島可憐夜。天女現時天樂聞。

龜井天神祭

玄澗不清龜井清。在天靈降好春晴。
廟官高誦古梅詠。馨德尚餘千歲榮。

諸莊看梅

江都人士厭豪華。比屋誰能種洛花。
酷愛野梅饒韵致。徧尋林下水邊家。

上巳離祭

例祭離人雙聖形。綵壇春麗小朝廷。
白醪華蛤薦時味。仍供桃花紅一瓶。

潮乾拾魚

春沙潮退廢人多。蓮步聯翩涉淺波。
比目倩他槌指捕。玉纖親拾小拳螺。
奴婢換主

僅過家家離祭辰。燕來鴻去未兼旬。
一晷傭似一宵客。呼主亦猶東道人。
下谷稻神祭

兩侯搶隊護神輿。太鼓鼗鏜行自徐。

好是春風台麓路。殘花雪濺綵山車。

花相撲

誰同俠婦助夫謀。有力場中捉鬼投。
喜極全身為大裸。錦鮮一擲付纏頭。

芳街夜櫻

名花國色惱情人。百鎰黃金一刻春。
不比苑桃貪結子。移栽只趁艷陽辰。

龍山叢市

落紅痕滿買叢塲。春老龍山暮雨涼。
緬想醉漁春月下。夢魂猶帶野花香。

櫻塲騎射

脚躡雙鐙手引弓。迴身斜射馬蹄風。
飛花影似鷓毛散。春在響絃鳴鏑中。

罾水晶魚

花落雨汀多。夜漁罩烟數罟舉。徐徐。
一篝紅火翠楊裡。閃出晶晶纖白魚。

山郭看躑躅

一鷓殼裡一開花。山郭春濃處處家。
殷術誑人輸郭訣。順天植木簇奇葩。
處處游春

韻人趁雨俗人晴。不佩一瓢唯獨行。

游遍東都隨處樂。有花有酒值清明。

四月朔更衣

春過江橋雨意闌。重綿脫盡柳身單。
趁時名妓新裝好。不怕生衣惹麥寒。
賽水天宮

奇驗何唯免水災。乘春報賽乞符來。
山茶扁額鐵猫小。納向祠前再拜回。

灌佛會

誰種無憂一樹根。卯花插處萬人屯。
甘茶聊復調香水。學八龍王灌獨尊。

謁烈祖廟

神君遺德莫能加。肅肅兩山塵絕此。
三百年來人百萬。薰風四月拜松花。
松魚羞新

方丈盤肴一食前。豪華日興要新鮮。
黠商先進松魚膾。幾聶華紅取萬錢。
城居秧鷄

自是葦堂隔稻陂。稀聞剝啄韻殊奇。
勿追門下鷄鳴客。失脚苔岩墮暗池。
端午賀

簷際靈萑瑞色生。辟邪香泛酒杯清。

華筵紙甲朱門幟。文治猶能記武成。

賣蚊幘

蚊烟未見簇昏黃。晝寂門前有叫商。
覆檐碧雲涼影動。薰風一路曳聲長。

楊弓會

節過端陽已二旬。一場爭射要超倫。
養弓誰弄穿楊矢。百發紅心百中新。

花火開場

玉鑰雙家巧且新。平安火處簇游人。
砲聲連發娘軍鬧。滿岸烟花五月春。

加邨獻冰

加侯陰室氣堅凝。好助松風滌熱蒸。
百萬斛珠何用貢。薦珍一片玉壺冰。

登假富山

小築蓮峰喜易攀。炎天只畏日光殷。
誰知一百年前事。雪壓真光寺裏山。

山王祭

炎氛翹氣滿街深。大祭喧傳大鼓音。
請看俠夫衣彩麗。拖來義婦典身金。
如齋賣藥

不畏三庚赫日天。頭無一笠汗流肩。

何須叫賣辟炎藥。擔上箱鐸敲自傳。

食嘉祥饅

正色姑孃喫彩粢。爭祈新福趁佳期。
多嬌少女無多欲。一笑開唇下箸時。
泛舟納涼

放船寧待夕陽頽。樂水人消午熱來。
誰吐晉翁神妙句。一川白雨洗炎埃。

賣麥湯

呼客招涼夜榻陳。香湯笑進味甘珍。
紙燈籠下依微影。渾似游仙夢裏人。

賣水

蘆棚隔斷午天炎。叫冷敲聲兩耳霑。
止渴路人頻一飲。價廉泉水合名廉。

賣枇杷葉湯

靈湯新賣有枇杷。日飲尤宜辟暑邪。
聽到烏圓猫破睡。行商元自喚宗家。

七夕星祭

高揭長竿戶戶多。牋天兒女意如何。
應期雲錦文章麗。寫出名媛乞巧歌。
兩寺插花

七夕東西兩寺堂。禪薰滿座簇秋芳。

僧家不吃人間巧。星祭唯成本願香。

回向院施餓鬼

同投一穴鬼無緣。飢餓迷魂未化仙。
節近雙蓮秋寺夕。授經施食好開筵。

盂蘭盆會

神佛寧論道不同。導人追遠感交通。
蘭盆一點燈無盡。照自天南到海東。

賽關王

家家鬼節忽過時。人想來生要布施。
欲免剉燒春磨苦。惡姑懺悔禱冥司。

淨真寺觀靈寶

真寶多藏古淨宮。從吾所好鑒何同。
咸陽瓦硯感文士。中將藕絲驚織工。

華街籠燈

一紗燈放一茶軒。人客看過賞語喧。
畫樣誰家誇最好。年年新案逐秋翻。

四萬六千日賽

精靈未祭况閻羅。只拜慈雲効柰何。
此日賽來唯一日。抵他四萬六千多。

廿六夜待月

夜深山閣客凝眸。怪底月華揚便收。

元是水邨烟火戲。高花放出柳梢頭。

靜勝寺觀道灌像

靜勝寺秋涼氣新。吊來扇谷古名臣。
太平誰問築城術。只話棣棠花雨春。

看七草花

七芳曾得兩歌傳。滿世評同已百年。
此外幽花縱有韻。無名不復受人憐。

八胡媚女白衣

八胡清秋屬麗媚。西風涼動白衣裳。
却思扶病人披縞。帶雨梨花壓象床。

中秋賞月

誰尋武野夜光幽。三五江城人滿樓。
團粉好邀團月供。合家歡作好中秋。

北里蹈歌

西風北里已涼天。幾樹名花不抵錢。
俄頃戲催延客計。一場歌舞一樓前。

九日賀

五節將終候尚嘉。菊黃酒碧滿城家。
朝衣披絮齊追例。未必秋寒一夜加。

諸園縛菊

誰愛黃花本色濃。翻憐紫白縛為容。

幾多人物精工外。戲價尤高不二峰。

兩寺觀楓

深霜蛙手引人遙。溪海叢林不寂寥。
幾竈煎茶兼煖酒。勝他宮苑折枝燒。

十三夜看月

照出寬平古雅游。分明月鏡挂高樓。
誰知人事經重九。却賞蟾輪未滿秋。

神田祭

盛祭回春九月天。明神豈啻照神田。
山車繒絲妓衣繡。映發菊金楓錦鮮。

亥日喫糕

不須亥日獻玄猪。喫到花糴味有餘。
飽賞牡丹三色美。酥煎一贈也嗤他。

茶博開鑪

開鑪曾客值開冬。小室籠香瀾粉濃。
霜葉不翻苔砌靜。碧陰圍屋樹重重。

福神祭

商家設祭趁清冬。利福相祈新酒濃。
誰似三郎神妙手。小金鈎釣大紅鬃。

祝神賽

掌珠將進土神前。扮出新妝照眼妍。

祝送小春晴暖路。嬌花笑在玉山肩。

新酒船

沈醉有龍船是杯。海雲黃處麴香堆。
灘清池釀各名酒。送入新川新港來。

初子祭

三子初逢月日時。祭祈新福恰相宜。
黑神先占大歡笑。紅飯一羅家一炊。

橐鑪祭

鍛家祭罷橐鑪開。手把黃柑擲路間。
憶昔天孫神一目。徧鎔金鐸散人寰。

酉市

靈鷲當年攫惡蛇。此辰報祭賽人譁。
渠魁無復獲麇事。尚賣芋頭兼竹筴。

演劇開場

曉妝女忍五更寒。旦旦新顏要早看。
行到劇場鷄未唱。屋梁霜月鼓聲闌。

半田舞

紅衣白帕冒寒行。揮幟振鈴舞臘晴。
道是葛西金卷廟。禱人媯稚豆瘡輕。

寒夜賽

工人技要少年成。禱到嚴冬最厲精。

海國華言 卷之十一
裸跣賽神寒卅夕。雪風霜月鐵鈴瑤。

冬至

袖湯新浴汗香清。溫暖仍能進餅羹。
雲物不知天上事。一陽春已滿身生。

殘臘大掃

公宮平日點無塵。猶向殘年大掃新。
此事徧傳街八百。淨迎昭代好陽春。

歲市

旬七開場念四收。鬻爭春物與人稠。
圓青橙子尤多瑞。代代家門占大頭。

跳竈王

蒹笠裝成綵剪花。竹枝繫打促韶華。
頻呈吉語索錢急。跳入迎新祈福家。

年餅

春事相催餅肆中。糯香蒸曉臘寒空。
債春尤是收錢速。幾杵鳴時一臼終。
儺夕撒豆

迸電轟雷一夕勻。揚穀撒豆萬家人。
忽忽驅鬼出門外。迎福堂中先賀春。

江戸夢華詩卷之下 畢

明治十一年八月廿日板權免許

編輯人

沖冠嶺

京橋區竹川町二番地

出板人

中嶋清兵衛

京橋區弓町六番地

